

若失也真人知之乎善哉善哉真人前子問此事何一詳也哉然吾初生以來怪歲一長一短日一厚日一薄一前一却不及天師問恐遂不知之願聞其意善哉子之言也然厚者天之日也其次厚者地之日也其次厚者人之日也其最薄者萬物之日也真人知之耶唯唯行去勿復竟問是者子之私也非難為子窮說之也天下會無以為亦無益於帝王承負厄會百姓之愁苦故不為子分別道耳不惜之也唯唯多犯天師諱有大過不謙也樂欲知天上之事者有私乃來為子悉說之唯唯行去

太平經卷之六十六

右分別九皇十五帝九玉十五霸行度優劣法

太平經卷之六十七

六罪十治訣第一百三

傳四

真人前凡半平人有幾罪乎半平人不犯事何罪過哉意真人何其瞑冥也愚生不開達初生未常聞人不犯非法而有罪也子言是也與俗同記不睹凡人迺有大罪六不可除也或身即坐或流後生真人學迺不見此明白罪學獨不病憤憤耶愚生忽然不病之子尚忽然夫俗人懷寃結而死是也誠窮乎遂無知然而死訖覺悟天地間隔以來凡人先矇後開何嘗理乎願聞之然人積道無極不肯教人開矇求生罪不除也或身即坐或流後生所以然者斷天道與天為怨人積德無極不肯力教人守德養性為謹其罪不除也或身即坐或流後生所以然者迺斷地養德與地為怨大谷人也或積財億萬不肯救窮周急使人飢寒而死罪不除也或身即坐或流後生所以然者乃此中和之財物也天地所以行仁也以相推通周足令人不窮今反聚而斷絕之使不得徧也與天地和氣

為仇或身即坐或流後生會不得久聚也當相推移天生人使有所知好善而惡惡也幸有知知天有道而反賤道而不肯力學之自救或得長生在其天統先人之體而反自輕不學視死忽然臨死迺自究罪不除也或身即坐或流後生今使生遂無知與天為怨所以然者迺天自力行道故常吉失道則凶死雖愛人欲樂善著道於人身人不肯力為道名為無道之人天無緣使得有道而壽也迺使天道斷絕故與天為怨也人生知為德善而不肯力學為德反賤德惡養自輕為非罪不除也或身即坐或流後生所以然者與地相反地者好德而養此人忽事不樂好德自愛先人體與地為怨也天生人幸使其人人自有筋力可以自衣食者而不肯力為之反致飢寒負其先人之體而輕休其力不為力可得衣食反常自言愁苦飢寒但常仰多財家須而後生罪不除也或身即坐或流後生所以然者天地乃生凡財物可以養人者各當隨力聚之取足而不窮及休力而不

作之自輕或所求索不和皆為強取人物與中和為仇其罪當死明矣此有六大罪而天憎惡之其罪不可除也真人知之耶唯唯願聞天師其為罪何一重也噫子曰益愚何哉是乃滅門之罪也何故言其重乎愚生甚怪之不知其要意今唯天師更開示之令使大覺悟深知其意不敢復犯也然真人言善哉吾辭將見矣真人宜自隨而力記之唯唯行今皇天有道以行生凡物擾擾之屬悉仰命焉今大深道人或默深知之著其腹中不肯力以教人也夫教人以道比若以火予人矣。少人來取之亦不傷其本也無極人來取之亦不傷其本今幸可共之以教天下之人助天生物助地養形助帝王脩正又使各懷道求生惡死令使治助治人不復犯法為邪凶惡其心善則助天地帝王養萬二千物各樂長生人懷仁心不復輕賊傷萬物則天為其大悅地為其大喜帝王為其大樂而無憂也其功增不積大哉夫一人教導如化百愚人百人俱歸各教萬人萬人俱教已化億人億

人俱教教無極矣此之善上洽天心下洞無極人民莫不樂生為善帝王遊無職又何傷於人而不力相示勅今人幸蒙先師勅戒得深懷至道而閉絕不以相教示使人無所歸命皆令強死冤結名為斷天道人多失道而妄為天也不得久生地也不得久養夫人不得不知道小人無道多自輕共作反逆犯天文地理起為盜賊相賊傷犯王法為君子重憂紛紛不可勝理君王旦夕念之悒悒自愁苦使天地失其正災變惟不絕為帝王留負吾尚未能悉言夫斷天道大逆罪過不可勝記故財舉其綱紀示真人是非重罪當死明耶死中尚得有餘過故流後生也可核哉真人其慎之矣唯真人迺知一核可謂已得長百遠凶害矣唯唯不敢離勅然子已賢明知天命矣必生去死不復疑也今謹以聞天道之命願得知地德之勃然夫地之有大德專以順天之道以好養萬物擾擾之屬莫不被恩德養成其中者是故大深大德之人當象此為行幸蒙先師功力得懷藏善道無極之

德夫德以教人比若臨大水而飲之也少人往學德亦不傷其本無極之人往學德亦不傷其本也如力教教之皆使凡人知守深抱德各自愛養其身其善者上可助天養且生長之物下可助地畜養向成之物悉并力同心無有惡意其中大賢明心易開示者迺可化而上使為君之輔其中賢者可為長吏師其下無知者尚為民間之師長凡人莫不俱好德化而為善者也為教如是迺上有益於天下有益於地即大化之本根助帝王養人民令不犯惡為耶君子垂拱而無憂其功著大天地愛之可移於官也今則或懷有德廣大而反詳愚閉絕道德之路不助天養其且生不助地養其且成不助帝王和諸民人今使愚人後生遂暗無知白黑不分明互死不移遂為小人不可東西忽身自輕相隨為非奸軌畜積上下不能復相教冥冥憤憤無有忌諱上犯天文下犯地形其行逆四時亂五行為君子大憂為小元起害為賊盜或還以自敗僂其父母因而無世今尚但為真人

舉其綱紀見其始使衆人一覺自策之耳不肯教人德名爲斷絕地之養道其罪過如此矣是之爲無狀乃死尚有餘罪故流後生也真人知之耶可核哉可核哉真人知蚤核可謂且得活矣唯慎之唯唯謹已受道德之禁願聞仁者之行然夫天地生凡財物已屬於人使其無根亦不上著於天亦不下著於地物者中和之有使可推行浮而往來職當主周窮救急也夫人畜金銀珍物多財之家或億萬種以上畜積腐塗如賢知以行施子貧家樂名仁而已助地養形助帝王存良謹之民夫億萬之家可周萬戶子陳收新母疾利之心德洽天地聞於遠方尚可常得新物而腐塗者除去也其中大賢者迺日奏上其功於帝王其中小賢日舉之於鄉里其中大愚人償報恩者極十有兩三耳安能使人大貧哉爲善不止大賢深明舉之名聞國中四海人道之者塞道明王聖主聞之見助養民大喜因而詔取位至鼎輔因是得尊貴世世無有解已尚爲大仁天下少有不負先祖

下不負於子孫天地愛之百神利之帝王待之若明友比鄰示之若父母功著天地不復去也祿著官位不復賤也名著萬民不復滅也夫仁可不爲乎哉或有遇得善富地并得天地中和之財積之延億億萬種珍物金銀億萬反封藏逃匿於幽室令皆腐塗見人窮困往求罵詈不予既予不即許必求取增倍也而或但一增或四五迺止賜予富人絕去貧子令使其飢寒而死不以道理反就笑之與天爲怨與地爲怨與人爲大仇百神憎之所以然者此財物迺天地中和所有以共養人也此家但遇得其聚處比若倉中之鼠常獨足食此大倉之粟本非獨鼠有也少內之錢財本非獨以給一人也其有不足者悉當從其取也愚人無知以爲終古獨當有之不知迺萬尸之委輸皆當得衣食於是也愛之反常怒喜不肯力以周窮救急令使萬家之絕春無以種秋無以收其冤結悉仰呼天天爲之感地爲之動不助君子周窮救急爲天地之間大不仁人人可求以祭祀尚不給與

百神惡之欲使無世鄉里紀固欲使其死盜賊聞之舉兵往趨攻擊其門戶家困且死而盡固不肯施予反深埋地中使人不睹無故絕天下財物之地上之用反爲大壯於地天下大惡之地大病之以爲大咎中和之物隔絕日少因而坐之不足飢寒而死者衆多與人爲重仇夫天但好道地但好德中和好仁凡物職當居天下地上而通行周給凡人不足反迺見埋病悒悒不得出見夫天與地本不樂欲得財也天迺樂人生地樂人養也無知小人反壅塞天地中和之財使其不得周足殺天之所生賊地之所養無故埋逃此財物使國家貧少財用不能救全其民命使有德之君其治虛空夫金銀珍物財貨作之用人功積多誠若且勞當爲國家之用無故棄捐去之上下地又不樂得之以爲大病以爲大壯今愚人甚不仁罪若此寧當死不耶中尚有忿然不知足者爭訟自寬反奪少弱小家財物殊不知止吾尚但見真人使使財舉其綱見其始夫大不仁之人過積多不

可勝紀難為財用真人宜熟思之故天地中  
和三氣憎之死尚有餘罪當流後生真人寧  
覺知之耶唯唯可懷哉吾不欲聞也真人遺  
此語天必奪子命今知覺悟惡之且活矣自  
勅慎事唯唯謹已敬受道德仁戒願聞有知  
不好學真道意善哉子之言也夫天生人幸  
得有賢知可以學問而長生天之有道樂與  
人共之地有德樂與人同之和有財樂以  
養人故人生樂求真道真人自來為之不止  
比若與神謀曰歌為善善自歸之力事眾賢  
眾賢共示教之不復遠也可以全其身不負  
先人之統佗人盡天終獨得竟其天年人皆  
名惡獨得為善人為眾人師聞於遠方內懷  
真道德仁而有之助天生物助地養形助帝  
王化民上師廼可化無極人盡使愚人守道  
不為非中師可化萬人小師可化千數百人  
致有益於君王使小人知禁不犯非匪邪上  
感得官不負祖先不辱後生維學若此寧可  
不為乎故古者聖賢悉以勸學人為大憂助  
天地生成助帝王理亂此天地之間善人之

稱也或有愚人生而懷愿有知而不肯力學  
真道反好為浮華行以欺人為子則欺其父  
母為臣則欺其君為下則欺其上名為欺天  
罪過不除也或有反好俗事爭鬪相隨為非  
賄真人之入反大笑之笑之言無以學為遂  
今冥冥愚無可知又好勝而不可苛言天地  
無數賢深無知恣情而行上犯天文下犯地  
理出入無復節度歸則不事父母羣愚相與  
會聚遂為惡子為長吏致事還戮其父母不  
能自惟愚因逃亡為盜賊行害傷殺人殊不  
止此正天所忌地所咎帝王所愁苦百神所  
憎父母所窮也此害人之大災絕其先人之  
統子也今不力學真道為行如此於真人意  
寧當死不更有餘罪流其子孫尚名為惡人  
之世盜賊之後惡寧流後生不耶今尚但為  
真人舉其端首其惡不可勝記難為財用真  
人寧覺知之耶真人自慎唯唯吾甚懷哉子  
知懷已去惡矣謹已具聞四事願後聞其次  
然夫天生人使其具足乃出之常樂其為道  
與德仁人幸有知可以學德天地以德養萬

物樂人象之故太古之德人忍辱象地之養  
物也人學為之則其心意常悅不復好傷害  
也見事而慎之日而為者善不復欲為惡也  
以類相聚日益高遠為之積久因成盛德之  
人莫不響應眾人歸向之聚謹順善不止因  
成大深師其德廼之助天養欲生之物助地  
養欲長之物又好助明王化民使為謹不復  
知其凶惡小為德或化千數百人大為德或  
化萬人以上因使萬人轉成德師所化無極  
為德不止凡人莫不悅喜天地愛之增其算  
鬼神好之因而共利祐之其有功者廼人君  
官仕之德不樂傷害眾人樂之好之所求者  
得居常獨樂無欲害之者此本由學順善為  
德廼到于斯名聞遠方功著天地不負祖先  
不辱後生今人或幸有知心知善惡而反自  
輕易不力學為善德反隨俗愚暗之人為惡  
好用氣尚武辭語常凶言出而逆欲以伏人  
自言便復有便於人者人自言勇力復有勇  
力於人者故凡天下之事各有所伏窮故可  
制也夫大火當起之時若將不可拘得水便

死人為不善當怒之時若將不可制也得獄便窮用口若將不拘得病使降故夫天地治人悉自有法尺寸人乃有知不肯好學反自輕為非所居為凶無愛之者天地憎之百神惡之帝王得愁苦之此不成善人自成盜賊死尚成惡鬼用力強梁其死皆不得用道理人莫不共知之而自易不為善汙先人之統負於後生之子遂見字為凶賊人之類也人莫肯與其交語行人不欲與同道此子何過承負父母之惡尚或見謂為盜賊之子或遂得死亡焉真人來人自易不好學於明師為德反隨小人過乃如此寧當死有餘罪不乎可畏哉天師勿須道吾念之已苦心痛矣見人不學以為小事安知迺致此乎人甚愚與俗人相似人不深計死有餘罪真人既有功於天地慎之唯唯不可自易也吾尚但舉其細見其始不學之惡不但盡於是也子得吾書覺悟自深計之唯唯誠得歸便問處精之詳之然是也學而不精與夢何異唯唯謹已受吾事之勅願聞人生有力不為之教然天

地共生蚊行皆使有力取氣於四時而象五行夫力本以自動舉當隨而衣食是故常力之人日夜為之不懈聚之不止無大無小物得者愛之凡物自有精神亦好人愛之人愛之便來歸人比若東海愛水最居其下天下之水悉往聚因得為海君子力而不息因為委積財物之長家遂富而無不有先祖則得善食子孫得肥澤舉家共利為力而止四方貧虛莫不來受其功因本已大成施予不止眾人大譽之名聞遠方功著天地常力周窮救急助天地愛物助人君養民救窮之不止凡天地增其算百神皆得來食此家莫不悅喜因為德行或得大官不辱先人不負後生人人或有力反自易不以為事可以致富反以行聞訟妄輕為不祥之事自見力伏人遂為而不止反成大惡之子家之空極起為盜賊則飢寒並至不能自禁為姦其中頗不肖子即飢寒而死勇力則行害人求非其有奪非其物又數害傷人與天為怨與地為咎與君子為仇帝王得愁焉遂為之不止百神

憎之不復利祐也天不欲蓋地不欲載凶害日起死于道旁或窮於牢獄中戮其父母禍及妻子六屬鄉里皆欲使其死尚有餘罪復流後生或成乞者之後或為盜賊之子為後世大瑕真人前其過責如此寧當死有餘罪不吾見天師說事吾甚驚核心痛恐不能自愈真人知心痛將且生活矣若忽然不大覺悟子死不久也慎之吾言不可犯犯者身滅矣非吾教之也其行自得之子亦知之乎唯唯吾為子陳此六事未能道其萬分之一也賢深得吾道宜深思遠慮勿反苟自易不怨為善也為力學想得善為惡則反迺降人也各自為身計此中有六死罪又有六大善俱象之為身為其善必得善也自易為惡者日得凶惡子矣自策自計莫樂於自恣慎之思之惟之念之賢明之心必當易開也道德仁善付有道德之士凶惡付不深計之子此格法能皆象善書文以自正則天下無復惡人也此乃天上太古洞極之道可以化人人一知之俱為善亦不復還反其惡也上士樂生

( 254 ) A. 13 19-2

可學其真道大深大賢可學其德好施之人可學其仁有知之人可學其知有能之人可學其能有力之人可學其力如能并盡用之思之熱之身已遠凶惡矣天地愛之六方養之帝王無復事也。廼長游而治真人亦知之乎大樂至矣吾甚大喜子可謂樂善知之矣。是故古者賢聖廼教而不止者。廼睹天禁明各為身計也。故賢聖之教辭語滿天下也。子獨不覺乎善哉善哉。是故古者聖賢上士皆悉學晝夜力學而不止者。亦睹見天地教令明也。故不敢自易為非也不敢自輕易而不力學也。故得長吉而無害。此諸賢者異士本皆無知。但由力學而致也。此中諸凶惡人。悉由不力學自輕自易所致也。吾之為道吉凶之門戶也。子亦豈知之耶。唯唯。故都舉廼以上及其下也。何謂也哉。噫子意何不覺也。見天師遺說今更眩不自知。以何為覺。以何為不覺也。今使子知行之真人。前天治法化人為善。從上到下有幾何法哉。其法萬端。各異。意然真人尚正。若此俗人難覺。迷日久是

也有。廼唯天師然助帝王治。大凡有十法。一為元氣治。二為自然治。三為道治。四為德治。五為仁治。六為義治。七為禮治。八為文治。九為法治。十為武治。十而終也。何也。夫物始於元氣。終於武武者。斬伐故武為下也。故物起於太玄中於太陽。終於白虎。故元氣於北而白虎居西北之謂也。故天使元氣治。使風氣養物。地以自然治。故順善得善。順惡得惡也。人者順承天地中和。以道治。主動道凡事通。而往來此三事。應天地人識。過此三事而下者。德仁為章。句過仁而下多傷難為意。故吾之為道。常樂上本天之性。戒中棄未天之性也。生凡物本者。常理到中而成。至終而亂。失亂者不可復理。故當以上始也。故天常守本地守其中。一轉人者守其下。三轉故數亂道也。真人豈已曉知之耶。唯唯。子今有疑。夫隨師可言不教有疑也。真人前天將祐帝王。以何為明。證哉。將利民臣。以何為效乎。唯天師今不及何也。數言而不中。多得過。故不敢復言也。噫乎行唯唯。然天將祐帝王。子其琦

文今可以治用之。絕踰與陰陽相應。將利小臣也。予其良吏。將利民也。使其生善。子真人言是。豈復有奇說耶。而已。極唯天將欲興有德人君也。為其生神聖。使其傳天地談通。天地意。故真人來為其學也。宜以付謹良之民。覺其心。使其惟思。付上有大德之君也。以示眾賢。共曉其意。已解以歸百姓。百姓得之。十五相從。議之治之。連不平。非獨天地人君也。過乃本一在人。長長自得。重過責於皇天后土。皆由一人。時有先學得真道者。不力相化。教大深。幸先知德力。不相化。畜積有財之家。不肯力施。為仁人生。有知足以學。而不肯力學。求真道。以致壽。有能足以學。德以化其身。而不肯力學。德以自化。有力不肯力作。自易反致困窮。此有大過。六天人為是。獨積久。天地開闢以來。更相承負。其後生者。尤劇積眾。多相聚為大害。令使天地共失其正。帝王用心。意久愁苦。而不治。前後不平。天大疾之。故吾急傳天語。自太古到今。天地有所疾苦。悒悒而不通。凡人不得知之。皆使神聖人傳其

辭非獨我也真人勿怪之也今吾已去世不可妄得還見於民間故傳書付真人真人反得已去世俗不可復得為民間之師故使真人求索良民而通者付之今趨使往付歸有德之君也敢不往付留難者坐之也何其重也今天當以解病而安帝王令道德君明示眾賢以化民間各自思過以解先人承負之譴使凡人各自為身計勿令懈怠後天且大喜治立乎矣子或懷狐疑以吾言不大誠信者吾文但以試為真所以然者古文億億卷其治常不能太平也今賢明深長獨懷狐疑謂書不然也夫勇士不試安知其多力見文而不試用安知其神哉吾受天言以試真人自是之後得凡文書皆立試之不得空復設偽言也天大疾之地大苦之以為大病誠也寬忿恚因使萬物不興昌多災天死不得竟其天年帝王惰悞吏民雲亂不復相理大咎在此六罪也有道姦道不肯力教愚人有德妬德不肯力化愚人有財畜積而妬財不肯施予天生凡人使施之天有知不肯力學正

道以自窮見教反笑之有能不肯力學施見教反罵詈之有力不肯力作可以致富為仁反自易懈情見父母學教之反非之故勅真人疾見此文使眾賢各自深惟念百姓自思大過真人寧曉知教勅耶唯唯今神人既為天陳法何不但得人而已布於民間必當以上下平善哉善哉今天上極太平氣立至凡事當順故以上下也不以上下則為逆氣令治不平但多由逆氣不順故也真人欲復增之耶不敢也故當以上下勿復重問唯唯行去慎事各為身計此有大過六天道至嚴不可妄為天居上視人唯唯願復更請問一言凡人已得要道要德當於何置之當上以付其君何必當以付之也夫要道要德所以安君也以治則得天心夫要德所以養君以治則得地意實知之而不肯奏上皆為不敬其罪不除何其重也觀子之事植辭如無一知者夫為子乃不孝為民臣不忠信其罪過不可名字也真人乃言何一重者等也真人之學何不日深反日向淺哉甚愚生實不睹子

尚言不睹夫俗人蔽隱藏其要道德反使其君愁而苦愚暗咎在真道德蔽而不通也又要道要德所以稱天也要德所以稱地也愚人廼斷絕之天憎之地惡之其過不除也真人幸獨為天所私得壽而學友未盡廼及天十六

禁宜事者慎之唯唯

右天教合和使人常吉遠凶之經

○ 太平經卷之六十七